



D'Aufblattler Tanzherrn Rud

Rudenkirtag Sierning CORONA SPEZIAL



<p>Wirkli' schneller ois ma denkt is' ma komplett eingeschränkt! – Des gilt a für'n „Ruden-Kirta“, für de Gstanzln und de Liada. – Heuer, da muass ois pausier'n, aber nexts Jahr dann in Siagn, do sama „pumperlg'sund“ und „g'impft“ – dann wird wieder „g'spott“ und „g'schimpft“...</p>	<p>D' Bezirkshauptmannschaft Steyr-Land, sie is' FEST in "Frauen-Hand"! - Nach da Altreiter-Windsteiger, tuat de Breitwieser g'schwind weiter. De gibt ihr "Amterl" ehzeit a(b) - is' "Chefin" jetzt van "Krisen-Stab". - Drauf folgt ihr d' Spöck Barbara. - Wos is' nur mit de "Hawara"...</p>
<p>Ansober, Haberlander, Blümel schau'n aus wia a paar Ungetüme! Sie kemman ganz schee wüld daher, war'n länger nimma ban Friseur. Nur Landesrat Max Hiegelsberger hod mit'n Haarschneid'n goa koan Ärger. – Oamoi mit'n Handtuach „drüber“ g'wischt, schau is' da „Maxl“ wieda „frisch“</p>	<p>Ja, da Pfarrer va Siagn, der is' net zan „kloa kriag'n“! – Da „Ober-Dechant“ va Steyr hat hinter sich die „60er-Feier“. Er is' „zach“ und hod an Schmäh, is' umtrieb'ig wie eh und je. Ois „Wahlspruch gilt für'n Pfarrer Sperker: „Wos oan net „umbringt“, macht oan stärker“!</p>
<p>Mindestabstand, wo ma schaut, doss ma seine Aug'n net traut! - Da kloani "Baby-Elefant" gilt SCHAU LANG nix mehr im Land! Überall muasst Abstand halten - nur net im Bett zu Deina "Alten". Zan Glück derf ma nuh Kinder "mocha", sonst hätt' ma GOA NIX MEHR zan locha...</p>	<p>Was de Kunstschatze betrifft van Kremsmünsterer Stift, sans etla Millionen wert. Da Kustos dort, er woa so g'schert und hat verkaft fast fuchz'g Bilder. – Der traut si wos – a ganz a „Wilder“! – Schaut nuh so „selig“ drein manch' „Bruader“ – zwoa, drei, des san schau rechte „Luader“...</p>
<p>In Kalchmoar Manfred woll ma griäßn, wird s letzte Amtsjahr wohl verbiassn, aber dass mar net liagn, war net der Schlechta für Sierng, wann mas ganz genau nimmt, hat bei eahm fast alls gstimmt, sovül "Geibma" hats not - =(loben) mir tringan weiß oder rot!</p>	<p>Da neiche "Nasenbohrer-Test" gibt den Meisten jetzt den Rest! Willst 's Staberl "richtig" du gebrauchn, muasst da 's in d' Stirnhöhl'n "aufi" tauchen. "Aufi" macht's ja nix bestimmt, doch waumas wieder "aussa" nimmt, fehlt bei de Mehran, des steht fest, van Hirn des letzte Batzl Rest...</p>
<p>In Lippm Karl sei alter Garm, is znachst ban Anstartn gstorbm, wia der alte Kalt(e)nböck Fred, a Batterie eahm einbaut hätt, blinkt und hupt nuh voller Jux, des war dann sei letzter Mucks, zehntausnd Euro blecht der Fred, dass der Mercedes wieder geht!</p>	<p>Wüll a Mannerleit ganz schnell, auf an Sprung ins Bordell, is er leider angschmiert, weil sih dort nix mehr rührt, de Wang Li und d Ramona, leidn unter Corona, da muass er hoamhaxln und sei Weiberl wieder schn... euzn!</p>
<p>Aus Fucking is', ganz ohne Schmarnn, über Nacht jetzt "Fugging" word'n. - Des "Nest", des is' dadurch "entschärft". A Adlwang is' schau genervt! Vü besser klingert, des steht fest, der Name "Waldneukirchen West", weil de Bezeichnung Adlwang hert si ZU SEHR nach "Kuah-Ort" an...</p>	<p>Ma fragt si wirkli, is des gscheit - GENAU in da "Corona-Zeit" findet statt de Ski-WM. - Des is ECHT a weng "plem-plem"! - Najo, de "FIS", de wird's schau wissen, sie hod si jo NUH NIA wos "g'schiss'n"! Da bringt's goa nix, lang zu schimpfen. - Da hilft nur, unter Zwang zu "impfen"...</p>